

**Ang Ginharian isip Pagbuntog sa Pagsupil
ug isip Pagkausab sa Dagway ni Ginoong Jesus**

Basahong Kasulatan: Mar. 4:35-41; 9:1-13; Mat. 13:43a

- I. Ang ginharian sa Dios mao ang gahom nga mobuntog sa pagsupil—Mar. 4:35-41:**
- A. Dunay duha ka dagkong prinsipyo sa uniberso—ang pagbulot-an sa Dios ug ang pagsupil ni Satanang; ang bugtong panagsumpaki tali sa Dios ug ni Satanang kalabot man sa pagbulot-an ug pagsupil—Buh. 26:18; Col. 1:13:
1. Ang pagsupil dili man pag-ila sa pagbulot-an sa Dios ug pagsalikway sa pagbuot Niya:
 - a. Sa sinugdan arkanghel nga linalang sa Dios si Satanang, apan tungod sa garbo niya gituboy niya ang iyang kaugalingon, nisupak sa pagbuot sa Dios, nisupil batok sa Dios, nahimong kabatok sa Dios, ug nag-establisar sa kaugalingon niyang ginharian—Isa. 14:12-14; Ezeq. 28:2-19; Mat. 12:26.
 - b. Sa pagkasala sa tawo, nisupil siya batok sa Dios, wala moila sa pagbulot-an sa Dios, ug gisalikway ang pagbuot sa Dios; sa Babel hiniusang nisupil ang mga tawo batok sa Dios aron wad-on ang pagbulot-an sa Dios dinhi sa yuta—Gen. 3:1-6; 11:1-9.
 2. Bisag nisupil si Satanang batok sa pagbulot-an sa Dios ug bisag gisupak sa tawo ang pagbulot-an Niya sa pagsupil niini batok Niya, dili papadayonon sa Dios kining pagsupila; establisaron Niya ang Iyang ginharian dinhi sa yuta—Bug. 11:15.
- B. Nianhi si Ginoong Jesus aron mag-establisar sa ginharian sa Dios para matuman ang walay kataposang tuyo sa Dios—Mar. 1:14-15:
1. Ang ginharian sa Dios usa ka diosnong ginsakpan diin makabuot ang Dios aron mag-palampos sa Iyang plano—Mat. 6:10, 33; Luc. 12:32; Col. 1:13.
 2. Isip Dios nga nagpakatawo, nianhi si Ginoong Jesus aron mag-establisar sa ginharian sa Dios—aron mag-establisar og ginsakpan nga kabuhatan sa Dios sa Iyang tuyo pinaagi sa Iyang pagbuot—Juan 1:1, 14; 3:3, 5; 18:36:
 - a. Aron maestablisar ang ginharian sa Dios, nibarog si Ginoong Jesus isip madaogong tawo, nga nipildi ni Satanang ug niagwanta sa tanang kalisdanan, pagsupak, ug pangataki—Mar. 1:13; Mat. 4:1-11.
 - b. Gisangyaw ni Ginoong Jesus ang ebanghelyo sa ginharian aron maghinulsol ang masupilong mga makasasala ug maluwas, maangayan, ug masangkapan nga makasulod sa ginharian sa Dios—Mar. 1:14-15; Mat. 4:17.
 - c. Gigapos sa Ginoo si Satanang, ang tawong kusgan, ug gisulod ang iyang balay aron tulisan sa iyang mga manggad aron madala ang mga makasasala sa balay sa Dios pinaagi sa pag-anak pag-usab alang sa ginharian Niya—Mar. 3:27; Efe. 2:19.
 - d. Sa naghingilin ang Ginoo sa mga demonyo pinaagi sa Espiritu sa Dios, gilaglag Niya ang ginharian ni Satanang ug gipadangat ang ginharian sa Dios—Mat. 12:28.
- C. Ang rekord sa Marcos 4:35-41 hulagway sa pagsupil ug sa ginharian sa Dios isip ang gahom nga mobuntog sa pagsupil:
1. Dunay ginharian si Satanang, ang pagbulot-an sa kangitngitan, nga batok sa ginharian sa Dios—Mat. 12:26; Buh. 26:18:
 - a. Sakop sa ginharian ni Satanang ang mga demonyo ug naglukob sa mga tawo alang sa iyang ginharian—Mar. 1:23-27; 5:2-20; 7:25-30; 9:17-27; 16:9.
 - b. Si Satanang ang magbubuot sa kalibotan ug sa pagbulot-an sa kahanginan; duna siyay mga manulonda, nga mga sakop niya ingon nga mga magbubuot, mga pagbulot-an, ug mga magbubuot-sa-kalibotan sa kangitngitan ning kalibotana—Juan 12:31; Efe. 2:2; 6:12.
 2. Tungatunga sa pulong kalabot sa ginharian sa Dios sa Marcos 4:26-29 ug sa rekord sa pagpasundayag sa ginharian sa Dios sa 5:1-20, naay hitabo sa unosong dagat sa 4:35-41:

- a. Nagkombuya ang hulog nga mga manulonda sa kahanginan ug ang mga demonyo sa tubig sa pag-ulang ni Ginoong Jesus sa pag-adto sa pikas daplin sa dagat, kay nahibalo man sila nga hinginlan Niya ang mga demonyo didto—5:1-20.
- b. Gibadlong sa Ginoo ang hangin ug gipahilom ang dagat tungod sa masupilong mga manulonda ug mga demonyong nagpaluyo niadtong hitaboa.
- c. Sa gibadlong na Niya ang hangin ug gisultian ang dagat, nihunong ang hangin ug dihay dakong kalinaw, kay gibuntog na man ang pagsupil sa daotang mga manulonda ug sa mga demonyo sa gahom sa gingharian—4:39.

II. Ang gingharian sa Dios mao ang pagkausab sa dagway ni Ginoong Jesus—9:1-13:

- A. Ang gisaysay sa Marcos 9:1-13 hulagway sa gingharian sa Dios nga nianhi diha sa gahom; ang sentro ning hulagwaya mao ang gihimayang Jesus, ug uban Niya si Moises ug si Elias, nga nagrepresentar sa mga balaan sa Daang Tugon, ug si Pedro, si Santiago, ug si Juan, nga nagrepresentar sa mga balaan sa Bag-ong Tugon—vv. 2-4.
- B. Nagpasabot ang pagkausab sa dagway ni Ginoong Jesus nga nasuropan ug natuhopan sa Iyang pagkadios ang Iyang pagka-tawo; kining pagkausab sa dagway, nga mao ang pagkahimaya Niya, pareho ra sa pag-anhi Niya diha sa Iyang gingharian—v. 2:
 1. Natuman ang pulong sa Ginoo sa versiculo 1 bahin sa pag-anhi sa gingharian sa Dios diha sa gahom sa pagkausab sa Iyang dagway didto sa bukid—vv. 2-3.
 2. Ang pagkausab sa dagway, ang pagsidlak, ni Ginoong Jesus mao ang pag-anhi Niya sa Iyang gingharian; diin ngani nausab ang Iyang dagway, tua sab didto niabot ang Iyang gingharian—Mat. 16:28—17:13; Luc. 9:27-36.
 3. Ang pagkausab sa dagway ni Ginoong Jesus pagkaamgo man sa pagkamao Niya.
 4. Ang gingharian mao ang pagsidlak sa realidad ni Ginoong Jesus; kanang maanaa sa pagsidlak Niya maanaa man sa Iyang gingharian—Bug. 22:4-5.
- C. Gisabod na si Cristo sa atong kasingkasing ingog binhi; motubo ug maugmad kining binhia hangtod mamulak ug mapadayag diha sa himaya—Mar. 4:26-29; Col. 3:3-4:
 1. Sa Marcos 9 makita nato ang pagkausab sa dagway ni Cristo nga binhing gisabod sa Marcos 4.
 2. Ang Nadawat nato ingon nga binhi sa gingharian sa Dios kinahanglan motubo gyod sa sulod nato hangtod mobulak Siya gikan sa sulod nato; kining pagpamulak mao unya ang praktikal ug masinatian nga pagkausab sa dagway sa Ginoo sa sulod nato—Col. 1:27.
 3. Mausab na ngani ang dagway ni Cristo sa sulod nato, mahimong gingharian sa Dios kanang pagkausaba nga magbuot sa tanang butang sa atong kinabuhi—v. 13.
 4. Dili gyod maanaa sa natural nga kinabuhi ang iglesia nga gingharian sa Dios; maanaa lang kini ning ginsakpan sa pagkausab sa dagway—Rom. 14:17.
 5. Kon andam tang mawad-an sa kinabuhi-sa-kalag nato tungod ug alang sa Ginoo, masinati nato ang madaogong pagkausab sa dagway diha sa iglesiahang kinabuhi; mahimo unyang tinuod nga pagkadasig pag-usab kining pagkausaba—Mar. 8:35-38; Mat. 16:25-27.

III. “Unya magsasanagon ang mga matarong sama sa Adlaw sa gingharian sa ilang Amahan”—13:43a:

- A. Sa panahon sa pagpadayag sa gingharian, himayaon ang atong pagka-tawo sa mahimayaong pagkadios sa sulod nato—Col. 1:27.
- B. Sa usa ka bahin, mobalik ang Ginoo gikan sa langit, apan sa laing bahin, mogula Siya gikan nato; kon hingpit na Siyang makakinabuhi gikan nato, panahon na kana sa Iyang pag-anhi—Mat. 16:27; 2 Tes. 1:10; Col. 1:27; 3:4.
- C. Sa panahon sa hingpit nga pagpadayag sa gingharian, hingpit tang makasulod sa himaya—Rom. 8:18, 21; Heb. 2:10; Fil. 3:21.
- D. Sa millennium, mag-uban ni Cristo ang madaogong mga magtutuo sa masanagong himaya sa gingharian, samtang disiplinahan didto sa kangitngitan sa gawas ang napilding mga Cristohanon—Mat. 13:43a; 8:12.